



佛爲度衆生，方便受諸罪

智銘

「大智度論」集粹之九

佛光明色像，威德巍巍，徧至十方諸佛世界。佛從無量阿僧祇劫，集大功德，一切具足，佛世世修諸苦行，無量無數頭目、髓腦常施衆生。一切種種戒、種種忍、種種精進、種種禪定，及無比清淨，不可壞不可盡智慧，世世修行，已具足滿。此果力故，得不可稱量特殊威神，以是故，因緣大，果報亦大。

佛雖有大因緣、大果報，但在人中生，有父母，受人身力，故仍受九罪：一者、梵志女孫陀利謗佛。二者、旃遮婆羅門女，繫木孟作腹謗佛。三者、提婆達推山壓佛，傷足大趾。四者、迸木刺脚。五者、毗樓璃王興兵殺諸釋子，佛時頭痛。六者、受阿耨多婆羅門請而食馬麥。七者、冷風動故脊痛。八者、六年苦行。九者、入婆羅門聚落乞食不得，空鉢而還。復有冬至前後八夜，寒風破竹，索三衣禦寒，又復患熱，阿難在後扇佛。如是等世界小事，佛皆受之。

但是，佛有二種身：一者、法身。二者、父母生身。是法性身，滿十方虛空，無量無邊，色像端正，相好莊嚴。無量光明，無量音聲。聽法衆亦滿虛空，常出種種身，種種名號種種生處，種種方便度衆生。如是法性身佛，能度十方衆生。受罪報者，是生身佛，非是法身佛。以有二種佛身故，受諸罪無咎。佛得道時，一切不善法盡斷，一切善法皆成就，云何今實有不善法報可受？但憐愍未來世衆生故，現方便受此諸罪。佛實不應受此諸罪。如昔有阿尼盧豆，與一辟支佛食故，受無量世樂，心念飲食，應意即得。何況佛世割肉出髓以施衆生，豈乞食不得，空鉢而還？以是故，知佛方便，爲度衆生故，受此諸罪。云何方便憐

愍未來世？五衆佛弟子施福薄故，乞種種自活之具不能得。諸白衣或言：「汝衣食不能得，有病不能除，何能得道以益於人？」是五衆可答：「我等雖無活身小事，有行道福德。我等今日受苦，是先身罪報，今之功德，利在將來。我等大師佛入婆羅門聚落乞食，尚亦不得，空鉢而還，佛亦有諸病。釋子畢罪時，佛亦頭痛。何況我等福薄下人？」諸白衣聞已，瞋心將息，便以四種供養供給比丘，身得天隱，坐禪得道。是爲方便故，非實受罪。

又如毗摩羅詰經中說：「佛在毗耶離國，是時佛語阿難：『我身中熱風病發，當用牛乳，汝持我鉢乞牛乳來……』阿難持佛鉢晨朝入毗耶離，至一居士門下立。是時，毗摩羅詰在是中行，見阿難持佛鉢而立，問阿難：『汝何以晨朝持鉢立此？』阿難答曰：『佛身小疾，當用牛乳，故我到此。』毗摩羅詰言：『止！止！勿謗如來，佛爲世尊，已過一切諸不善法，當有何病？勿使外道聞此粗語，彼當輕佛，便言佛自疾不能救，安能救人？』阿難言：『此非我意，面受佛勅，當須牛乳。』毗摩羅詰言：『此雖佛勅，是爲方便，以今五惡之世故，以是像度脫一切。若未來世有諸病比丘，當從白衣求諸湯藥。如白衣言：『汝自疾不能救，安能救餘人？』諸比丘即可答言：『我等大師猶尙有病，況我等身如草芥，能不病耶？』以是事故，諸白衣等以諸湯藥供給比丘，使得安隱，坐禪行道。有外道仙人，能以藥草，咒術除他人病，何況如來一切智德，自身有病而不能除？汝且默然，持鉢取乳，勿令餘人異學得聞知也。』

以是故，知佛爲方便，非實病也。諸罪因緣，皆亦如是。以

是故，言佛其德特尊，光明色像，威德巍巍，以此神力，感動衆生。其有信者，皆至阿耨多羅三藐三菩提。佛有二種神力：一者、一處坐說法，令諸衆生遠處皆見，遠處皆聞。二者、佛在一處說法，能令一一衆生，各自見佛在前說法。有人見佛身徧三千大千世界而得淨信；有人各各見佛在前說法，得心清淨信樂歡喜。

釋迦牟尼佛世尊，雖有無量神力，能變化作佛，在十方說法，放光明度衆生，但亦不能盡度一切衆生，若一佛度盡，則無未來世佛也。因衆生不盡，以是故，應更有餘佛。惟二轉輪聖王不得同時出世，佛亦如是。同時一世，亦無二佛。佛經有二義，有了義，有深遠難解義。如佛欲入涅槃時，語諸比丘：「從今日，應依法不依人，應依義不依語，應依智不依識，應依了義經不依未了義。」故佛子不應執偏。

依法者：法有十二部，應隨此法，不應隨人。依義者：義中無諍好惡、罪福、虛實故，語以得義，義非語也。如人以指指月，以示惑者，惑者見指而不視月。人語之言「我以指指月，令汝知之，汝何看指而不視月？」此亦如是。語爲義指，語非義也。以是故，不應依語。依智者：智能籌量分別善惡，識常求樂，不入正要，是故言不應依識。依了義經者：有一切智人，佛第一。一切諸經書中，佛法第一。一切衆生中，比丘僧第一，布施得大福，持戒得生天，如是等是了義經。如說：「法師說法，有五種利：一者、大富。二者、人所愛。三者、端正。四者、名聲。五者、後得涅槃。」是爲未了義。云何未了？施得大富，是爲了可解。說法無財施，而言得富，得富者，說法人種種讚施，破人慳心，亦自除慳，以是因緣得富，是故言未了，是多持經方便說，非實義。是經中佛雖言世無二佛俱出，不言一切十方世界。雖言世無二轉輪聖王，亦不言三千大千世界無，但言四天下世界中無二轉輪聖王。作福清淨故，獨王一世，無諸怨敵，若有二王，不名清淨。雖佛無嫉妬心，然以行業世世清淨故，亦不一世界有二佛出。百億須彌山、百億日月，名爲三千大千世界，如是十方恆河沙三千大千世界，是名一佛世界，是中更無餘佛，實一釋迦牟尼佛。是一世界中，常化作諸佛，種種法門，種種身，種種因

緣，種種方便，以度衆生。

佛世難值，一切衆生，應一心向佛，但罪人輪轉三惡道，或在人天中，佛出世時，其人不見。如佛在舍衛城中，九億人家，其中三億家眼見佛。三億家耳聞，有佛而眼不見。三億家不聞、不見。佛在舍衛城二十五年，而此衆生不聞、不見，何況遠者？如有一次，佛與阿難入舍衛城乞食，是時，有一貧苦老母立在街頭。阿難白佛：「此人可愍，佛應當度。」佛語阿難：「是無因緣。」阿難言：「佛往近之，此人見佛相好光明，發歡喜心，爲作因緣。」佛往近之，貧苦老母迴身背佛，佛從四邊往，更四向背佛，仰面上向，佛從上來。低頭下向，佛從地出。兩手覆眼，不肯見佛，佛語阿難：「復欲作何因緣？」有如是人，無度因緣，不得見佛。以是故，佛言：「阿難！佛雖得值，如優曇波羅樹華，譬如水雨雖多，處處易得，餓鬼常渴，不能得飲。」是故，九十一劫中，三劫有佛，爲一佛世界故，不爲一切餘諸世界。是處劫空，無有佛出，甚可憐愍衆生，是指此間一佛世界衆生，非爲一切諸餘世界衆生也。

如此類推，十方世界，有十方佛。無量世界，有無量佛。東方無量世界，有成、有住、有壞，其相甚多，不可分別，如是乃至十方。是十方世界中無量衆生，有三種身苦：老、病、死。三種心苦：婬、瞋、癡。三種後世苦：地獄、餓鬼、畜生。一切世界中，皆有三種人：下、中、上。下人，著現世樂。中人，求後世樂。上人，求道，有慈悲心，憐愍衆生。佛言：「若無老、病、死、佛不出世。」是人見老、病、死苦惱衆生、心中作願：「我當作佛，以度脫之。拔其心病，濟後世苦。」如是十方世界，皆有佛出因緣。法身常放光明，常說法。衆生有無量劫，罪垢厚重，不見不聞。衆生心清淨，則能見佛，如一心念佛，信淨不疑，必得見佛。

是以，佛陀慈悲，爲憐愍娑婆世界衆生，方便受諸罪苦，期以脫盡衆生，佛世難值，諸衆生應常清淨，一心念佛自造值佛因緣，必蒙佛陀度脫也。

(完)